

Bouônjour tout le monde, ch'est mé, Sarah Jordan, acouo eune fais, auve la lettre Jèrriaise, aniet, Sanm'di lé neuf d'Mai deux mille vîngt-six.

Preunmiéthement, j'voudrais vouos souhaiter eune journée d'paix, n'importe tchi qu'ou faichyiz, aniet le jour nâtionnal dé l'île, lé jour d'la Libéthâtion – l'huiptante-tch'ieunième annivèrsaithe d'la Libéthâtion dé l'île dé l'otchupâtion par les Allémands.

Chang'gie d' sujet compliètement – Dépis lé mais d'Juillet deux mille vîngt-tch'ieune, eune anmie, Ann, et mé-même c'menchînmes eune tradition d'aller par la beusse prendre eune touônnée pouor eune journée (autcheune beusse tchi s'met en c'mîn à l'heuthe qué j'décidons dé s'entre-rencontrer ou j'sélectionnons eune destinâtion en avanche).

Chutte tradition a agrandi achteu auve d'aut's anmies étout. Jé n' cache pon mé-même mais mes compangnons cachent. Tout comme, jé chouaïsissînmes dé viagi par beusse pouor plusieurs raisons:

Preunmiéthement – ni l'iun ni l'autre a bésôin d' concentrer sur la route ni les aut' cacheurs.

Deuxièmement – j'rencontrons les gens qué j'n'avons pas veu dépis longtemps et j'pouvons rattraper tandi qué j'viageons.

Finnalement - comme invâriabliément j'allons à des pièches qué jé n'visitons pon ordinnaitement j'nos sentons comme j'sommes en "vacanche".

Jusqu'ach'teu ma favorite excursion 'tait Juillet deux mille vîngt-chîng. Jé c'menchîmes auve la beusse douze A d'la stâtion d' beusse, nommée la Libéthâtion, jusqu'à la Baie d' Saint Brélade. J'mantchînmes l'arrêt et j'marchînmes en amont l' mont Sohvi à l'hôtel Biarritz où'est qué j'avons bein mangi sus la terrasse, auve eune veue d' la Baie d' Saint Brélade. Ch'tait eune belle veue d'un aut' angl'ye pa'ce qué ch'tait la preunmié fais dé ch't' endroit.

Auprès not' èrpas j'descendînmes les gardîns dé l'hôtel jus'qu'à la grève. En trottant l'travers dé la grève j'vînmes un ênorme tas d' vièdes vannieaux, appathemment ch'est tchiquechouse dit "crabîn emplieunmé" – eune procédûthe tchi permet la craîssance.

Comme ch'tait hardi caud, j'prînmes l'opportunité d'nagi. Ch'tait hardi rafraîchissant d'nos tremper. Tandî qué ch'tait caud, i' y' avait eune brise agriabl'ye tchi fit l' chapé à Ann s'écapper et voler l'travers des rotchièrs, pouor né pus êt' veu. Auprès aver chèrchi l' chapé sans aver d'la chance, j'décidînmes dé rentrer en Ville. J'têmes ravies pa'ce qué la préchaine beusse 'tait lé quatorze, tchi 'tait auve lé copé ouvèrt. Tchil êcot! J'nos sentîmes comme tchitch'eunes en vacanche dans not'propre île.

Tch'est tout pouor aniet. Mèrcie bein des fais pouor m'aver êcouté.

J'espéthe qu'ous avez joui dé chu weekend d'la Libéthâtion. À la préchaine.